

0. Tazwart tamatut

Almud n tesniremt (Master I, LVA), ila sin n yiswiyen. Ger taggara n umesdis, anelmad ad yessiweḍ :

- ad yissin tinektiwin d tarrayin tigejdanin n tesniremt ;
- ad yesɛu tikti tamatut γef tesniremt n tmaziγt.

Γef waya, nebḍa agbur n wahil n ulmud-a γef sin n yimuren. Yal amur s timmad-is yebḍa d ixfawen.

Amezwaru, d amur azrayan, d amatu; yerza tussna neγ annar n tesniremt s umata. Deg-s, anelmad ad iwali tinektiwin d tmiḍranin tigejdanin : *tasniremt*, *tasekniremt*, *taγult tuzzigt*, *irem*, atg. Am wakken ara d-yemlil d kra n tezriyin d tarrayin iγef tbedd tussna-ya. Day, ad d-ttwasissnent teγdiwin tigejdanin n tesniremt akken i nezmer ad tent-naf deg kra n tmura n umaḍal.

S tegzi n yimenzayen yerzan tizri d tesnarrayt n tesniremt tamatut i nezmer ad nekcem deg umur wis sin. D amur anida ara d-nessegzi, γas s tewzel, armud asnirman n tmaziγt. Aya, ad d-yili deg wukuz n yiferdisen :

- tadra d umezruy n tesniremt n tmaziγt (asatal n tlalit; imahilen imenza...)
- armud asnirman (imawalen uzzigen, taγulin...);
- amkan n tesniremt deg tusudutin (tasdawit, tisudutin tunsibin...);
- tulmisin n yimawalen uzzigen n tmaziγt.

Γer taggara n temsirin-nney, ad d-nefk yiwen n wumuy n yimawalen uzzigen, gar wid yettwassnen deg tesniremt n tmaziγt.